

Goibekokale

ELGETA / Barikua / 2002ko azaroaren 15a / 118. zenbakia


KOORDINATZAILEA: Oxel Erostarbe • Barrenkalea 33 20570 BERGARA • Tel.: 943 76 92 71 • Faxa: 943 76 29 77 • Posta elektronikoa: goibekokale@goiena.com • Lege gordailua: S5475/95

Baimen ofizial barik gas-instalazioak aztertzen

OXEL EROSTARBE

Eusko Jaurlaritzaren balio ofizialik ez duen arren, Bilboko enpresa bat gas-instalazioak aztertzen ari da gure ibarrean. Elgetako zenbait etxetan ere egin dute iruzurra. Inongo balio ofizialik ez duen azterketa egiteagatik 60 euro kobratu dute gure herrian.

Elgetako Udalean esan digutenez, herritarrok kontuz ibiltzea komeni da. Teknikariaren bat azterketa egitera datorrenean, identifikazio ofiziala eskatu behar diogu, eta hura erakutsi bitartean ez da komeni inolako agiririk sinatzea. Izan ere, iruzurgileek sinatzeko eskatuko diguten agiriak eskumena ematen diezaioke gure gas-instalazioa aztertzeko. Bost urtean behin legeak gas-instalazioen azterketa egitera derrigortzen gaitu, eta horretara datozela esaten dute iruzurra egin aurretik. Teknikariari ziurtagiri ofiziala eskatzea komeni da, ezertan hasi aurretik. Debagoienean baimen barik azterketak egiten diharduen enpresa Bilboko da. Bizkaian dago erroldatuta, Sergas izenarekin.




Gas-instalazioa begiratzera datozela esaten dute iruzurra egin aurretik.

ELGETAN ERE EGIN DUTE IRUZURRA

Bilboko enpresak Elgetan ere egin du iruzurra. Udalean salaketa bakarra jaso duten arren, beste etxe batzuetan ere egin dute-

la uste du Udalak. Inongo balio ofizialik ez duen azterketa egitearren 60 euro ordaindu zuen herritar batek. Aurrerantzean argi ibili beharko dugu teknikariekin.



Euskadiko Bolo Txapelketako finalak Elgetan

Santa Eufemian, San Andresen eta Iruzubietan jokatu ostian, bixar, zapatua, Euskadiko Bolo Txapelketako finalak jokatu dira Elgetan. Aurtengo txapelketari gure herriko kiroldegiko bolatokixan emongo dotse amaieria.

Txapelketa irabazteko faboritua zein dan ez dago bat-be argi. Arratsaldeko bostetan hasiko dira finalak, eta bertan onena zein dan ikusi bihar. Bolatokixa gertu egongo da. Txirluak zeinek jotzen dittuan ikusi bihar./O.E.

AURREKONTUAK

Urtea amaitu aurretik onartu nahi dituzte

O.E.

Azken urteetan maiatza izan da aurrekontuak onartzeko garaia Elgetako Udalean. Aurten ordea, urtea amaitu aurretik aurrekontuak onartzea nahi dute udal ordezkariak. Halaxe azaldu zuen Udaleko azken osoko bilkuran Patxi Basauri alkateak. Batzorde bakoitzeko ardura daukaten zinegotzietan, lehenbailehen bertako aurrekontua aztertzen joateko eskatu zien alkateak.

Azaroaren 18rako batzorde bakoitzak aurrekusten dituen ezohizko gastuak jakinarazi behar ditu, aurrekontuak aztertzerakoan kontuan hartzeko. Dagoeneko zenbait batzordetan, baserriarrenean eta kirolenean adibidez, aztertua zegoen gaia

eta gainontzekoetan aste honetan bertan aztertu dute. Kultura batzordean, datorren urteko jaientan izango den danborrada handia da proposatu duten ezohizko gastuetako bat. Bestea Espaloian inbertitzea litzake, Kafe Antzokiaren proiektua aurrera eramane edo bestela, aretoa argi eta soinuarekin egokitzeko.

Alkateak adierazi digunez, datorren urteko aurrekontuei begira, Espaloia aretoa eta Balioanizdun Herri Zentroa egokitzeko lanak aurrera eramatea izango dira aurrekusten dituzten inbertsio nagusiak. Batzordetako proposamenak jaso ostean, hile bukaerarako aurrekontu proposamena egingo die zinegotzietan. Aurrekontuak, osoko bilkuran aztertuko dira abendu bukaeran.

LABUR

Gaixo eta adineko pertsonak zaintzen dituztenendako ikastaroa antolatu guran

Adineko pertsonak edo gaixoak dituzten senideei zuzendutako ikastaroa antolatu nahi du Ongizate Zerbitzuak. Taldea osatzeko, beharrezkoa da lehenbailehen jakitea zenbat lagunek duten interesa ikastaroan parte hartzeko. Parte hartzaile kopuruarekin zehaztuko dute gero ikastaroen ordutegia. Interesa dutenek edo zalan-tzaren bat argitu nahi dutenek gizarte laguntzailearengana jo behar dute azaroaren 20a, eguaztena, baino lehen.

Felipe Uriarteren diapositiba emanaldia izango da datorren egunean

Datorren egunean, azaroaren 21ean, *Hiru Handiak* diapositiba emanaldia izango da kultura etxean, 19:30ean. Hantxe izango da Felipe Uriarte, Hiru Handiak espedizioan parte hartu zuen mendizale ezaguna. Hainbat espediziotan parte hartu du Uriartek. Elgetan egingo duen diapositiba emanaldian, Hegoamerikako hiru ton-tor nagusien, Ojos del Salado, Pissis eta Aconcaguaren berri eman-go du euskal mendizale ezagunak.

Usoak kendu edo ez erabakitzeak herritarren iritzia jasotzen dihardu Udalak

Usoak eragiten duten zikinkeria dela eta kexa ugari jaso ondoren, usoak kendu edo ez erabakiko du Udalak urtea amaitu aurretik. Erabakia hartu aurretik, ordea, herritarrok gai horren gainean daukagun iritzia jaso nahi dute. Gure iritzia Udalaren webgunean edo udaletxeko Idazkaritzan eman dezakegu.

JARDUNABALKOITTIK



Oxel Erostarbe

Gasto zero entzun da

Gutxi gastau eta bueltak amari! Eta urtero moduan, bueltak barik, zorrak ugari! Ez da giro izango gure plazako etxian, urtia bukatzeko bi hillabeten faltan, eta tekninarixak mahai azpizetan zentimo billa. Ez dago dirurik! Teknikarixak bai, ugari! Gastatzeko dirurik ez eta bi hillabetian lanik ezin egin, oporretan. Proposamen bat, teknikari bakoitzak bere soldatian herena diru laguntzetatik lortu ezker...

Etxe barruan diru gutxi eta plazan, zortzi biharrian zazpi! Zerratu eta kitto! Pagua behera! Ustelduta zeuala esateko modu rebindikatibua. Arrazoia, norberana hartu eta kitto! Otsaillian aldatzia pentsaureta zeukela irakurtzia ez jakue bape gustau. Etorriko da otsailla. Ni be, landatu zain egongo naiz. Bittartian arrazoia zuek. Udala, beste batzutan ez moduan bandorik atara barik. Pisu kontua izango da...

Udalan banduak eta notiziak, interneteko www.elgeta.net helbidian topauko dittugu aurrerantzian. Norberan helbidian, notiziak jasotzeko aukera eta guzti. Komisaldegixetan moduan, plenotan be, webcam bat ipiñiko neuke, herritarrok han zer gertatzen dan ikusi daigun.

ELKARRIZKETA

IZASKUN ANUNTZIBAI/ELGETAKO KZGUNEKO ARDURADUNA


“Lotsak alde batera utzi eta mundu hau ezagutzera animatu nahi nuke jendea”

O.E.

Astlehenean zabaldu zuten Elgetako KZGunea. Dagoeneko zortzi lagun hasi dira ikastaroak jasotzen, eta abendurako ere jende dezente eman du izena. KZGuneako arduradun Izaskun Anuntzibairekin izan gara.

Lehenengo eguna; zer moduko harrera izan du KZGuneak?

Harrera ona izan duela esango nuke. Jende ugari etorri da informazioa eskatzera, eta ikastaroetan ere jende dezente eman du izena. Lehenengo taldeak astlehenean hasi zuen ikastaroa; gehienek bazeukaten informatikarekin harremana, eta azkar goaz. Ikastaroan oinarrikoenetik hasten gara, eta ez dago ordenagailuez ezer jakin beharrik. Poliki-poliki hainbat gai landuko ditugu, ordenagailua zelan pizten denetik, Interneten nabigatzen ikasteraino.



O.E.

Zer egin behar da ikastaroe-tan parte hartzeko?

Norberari gehien komeni zaion ordutegia zehazteko, KZGunean etorri behar da eta

izenemate orria bete besterik ez da egin behar. Dena dela, lotsak alde batera uztera eta mundu hau ezagutzera animatu nahi nuke jendea.

KIROLA

Estampak hartu du bere bidea

O.E.

Aurreko zapatuan, denboraldi-ko lehenengo partidua irabazi zuen Estampaciones Intxortak, Maixa tabernaren aurka. Estampakoek 59-38 irabazi zuten partidua. Hasiara-hasieratik nagusi izan ziren markagailuan elgetarrak, eta aurreneko minutuetan lortutako errentari eutsi zioten, amaiera arte. Taldea sasoi puntu onean dagoela esan dezakegu; aurrerantzean zer-nolako erantzuna ematen duten ikusi behar-ko dugu.

Hurrengo partidua etzi, domeka, jokatuko dute Estampakoek; 10:30ean izango da, Eibarko Celtics taldearen aurka.



O.E.

Aurtengo denboraldian ere Liga eta Kopa irabaztea da Estampakoen helburua.

IRAKURLIAREN TXOKUA

EAJ-REN HITZAK ETA EKINTZAK

Azaroaren 8ko GOIBEKOKALEn Zubiaurre Jaunak idazten zuen ezin garelako Garzonen probokazioetan erori, ezta falangisten aurrean protestatu ere. Orduan zein da bidea, EAJrena, Garzonen autoak zintzo betez? Euskal herritar gehienak lege hauen aurka gaude, baita paskongadako legebiltzarren gehiengo ere. Zergatik egin uko gehiengo honi, espainol legea betez?

Autodeterminazioari buruz: ez da abertzaleon helburu estrategikoa, eskubidea baizik. Nazioarteko legediak onartua. Herri bezala eskubide hori dagokigu. Lurraldetasuna bai da abertzaleon proiektu estrategikoa 6 herrialdeentzako eskubideak lortzea.

Ibarretxeren proiektu baskongadoak, non uzten du Euskal Herria? Euskaldunon askatasuna lortzea, giza eskubideak, elkarbizitza eta demokrazia errespetatuz, zeruko aingeruetan sinestea bezala da. Hori ez dute Estatuek inoiz bete 1200 eta 1521eko konkistetatik gaur egun arte.

Euskal Herrian gatazka politiko bat dago eta biolentzia alde guztiek erabiltzen dute: ETak, Guardia Zibilak eta Ertzaintzak. Galdetu bestela Bizkai aldeko azken atxilotuei. Biolentziaren aurka bagaude, espresio guztien desagertpenaren alde egin behar-ko genuke, horretarako prozesu demokratiko bat abian jarritz. Herri honetako biztanleek etorkizuna erabakitze-ko eskubidea dutela onartzeak ekarriko du benetako bakea.

SEBAS ARANZABAL

SAIOA ARANZABAL MASAJEAK

ELGETAN, DOMINGO ITURBE 10ean

- Kiromasajea •
- Reflexologia •
- Hidromasajea •
- Kirol masajea •



- Solariuma •
- Drenaje linfatikoa •
- Algekin eginiko estalkia •

Dei ezazu **646 50 00 29** telefonora ordua eskatzeko

Aperribay, s.l.

Marmoldegi eta granitoak

Pagatza indus. z/g. Tel. eta faxa: 943 78 90 21

20690 ELGETA

BOLATOKI

Taberna

Eguneko menua

Asteburuan menu bereziak, ospakizunak eta agur-afariak

Karta enkarguz

Artakale 2, ELGETA. 943 76 82 84

ERRETRATUZAHARRA

ELGETA

Azkoittiko Euskal Jaira
juan ziranekua

Euskal Herrixan egin zan lehenengotako Euskal Jaixa Azkoittian izan zan. Elgetatik jente ugari jua ei zan hara jaira, eta hau neska kuadrilliau da horren lekuko. Azkoittiko plazan dago etarata hau erretratuau.

Batzuk amonatxo jantzitta jua ziran; Ozkarbiko dantza taldea sortzeka zeguan ondio-

kan, eta bakoitzak bere kontura lortu ei zittuan jantzixok. Erretratuan ikusten dogun moduan, edarto atonduta eta orraztuta jua ziran, eta ligau zebeik be egon ei zan. Honek agertzen dira erretratuan:

Goiko illaran, ezkerretik eskumara: Mari Karmen Elorriaga, Elena Arantzeta, Libe Telleria eta Mertxe Mendikute.

Erdiko illaran, ezkerretik eskumara: Maite Zabala, Antoni Telleria, Juanita Sarasketa eta Eugenia Zubiare.

Beheko illaran, ezkerretik eskumara: Mariasun Agirre, Maribi Irazabal, Mari Ester Telleria eta Mertxe Elorriaga.

Urtea: 1962



ADI, IRAKURLE!


Zure erretratu zaharra argitaratzea nahi izanez gero, zatoz BERRIGARAra (Irizar jauregia, Barrenkalea 33) edo Elgetako kultura etxera. Zain gaituzu!

NOLAALDATUDIRENGAUZAK

ELGETA


San Roke
kalian gora

Eibar eta Arrasateko bidera lotuta jua da haunditzen Elgeta. Gaurko erretratuan Erdi Arotik gorde dan herriko kale bakarria ekarri dotsuegu. Lehenago herrixa babesten zeuan harresixaren aztarnak bertan ei dare. Azken urtiotan barritzen doa kalia. Oiñezkuendako egokittu dan kale bakarria da, eta zahartuta geratu diran etxiak barrittu egin dittue, lehenago egitturiari eutsitta.



≈ 1970

San Roke kalia espalo i eta guzti ikusi geinke. Etxe gehixenak barrizteka dare, eta kaleko zorua be ez da gaur egunekuaren modukua.



2002

Kaleko etxe gehixenak barrittu egin dittue. Batzuek pisu bat gehixago dakela be konturatu geinke. Zoruan galtzadarririk dare.



Zumelaga
JATETXEA

60 urte zuen zerbitzura!

San Antonio 5. BERGARA. 943 76 20 21

Sugoi

ERLOJUAK,
ARTIKULU
ELEKTRONIKOAK,
KALKULAGAILUAK...

Irizar pasealekua 2 behea
943 76 59 54 BERGARA

OGIZUN
koop. elk.
okindegia




San Pedro 21
BERGARA
943 76 20 49

Ibargarai 44-46
BERGARA
943 76 45 53

Zubillaga 10
OÑATI
943 78 24 13

Hartu aterkina

Azaroan, Agirre jantzi dendan egindako erosketek **oparia** daukate: aterkina.
Zatoz Bidekurutzeta 18ra!



Azkarate eta Ardatza: arotz lanetan behar duzun guztia



**HORMA-
ARMAIRU**
AUKERA
ZABALA

Eta mota
guztietako
ateak.
Informa zaitez!



Ateak • Leihoak • Horma-armairuak • Tarimak • Parketak • Sukaldeak

Neurrira ebakitako tableroak • Apalak • Kajoiak • Zokaloak
Moldurak, sarrailak • Manilak • Egurrezko objetuen pintaketa




AZKARATE
AROSZTEGIA

Telleria, 19 B-0-2 B-0-3
BERGARA
Tel.: 943 76 47 19
610 88 40 20

ARDATZA

Brikolaketa

Masterreka, 4 behea.
Tel.: 943 76 18 93
BERGARA





Guipuzcoana Euro Express: Nazio eta Europa mailako paketeria garraioa

San Juan Erreka z/g Elgeta bidea. Bergara - Tel. 943 763 642 - Faxe 943 765 425

